

第三冊

江水三

光緒十八年至宣統三年
(附編)

再續行水金鑑

諸青來



981026
1377

再

續

光

水

金

鑄

再續行水金鑑卷第二十二

江水編年二十二

光緒十八年二月丁未(十八日)兩江總督劉坤一江蘇巡撫剛毅奏吳淞江河道爲蘇州松江太倉等屬農田水利所資前經調撥營勇協同民夫通力合作業將開工及工竣日期先後奏報並將在事出力員弁遵旨擇尤酌保數員聲明此項工需於賑捐餘款積穀息銀暨各屬攤徵河工歲修項下支用自可邀免造報在案旋准工部咨仍令照例造冊送部核銷等因當經轉行遵照去後茲據江蘇藩司鄧華熙臬司陳澍會同蘇屬水利工程總局詳稱據原辦委員候補知府周連將用過銀數開冊呈請核報前來伏查此項開濬吳淞江工程自四江口迤東之橫濮口起至新閘大王廟止總計工長一萬二千五百五十二丈實挑土八十五萬九千三百七十五方零共用土方夫工及築壩工料等項庫平銀一十六萬九千五百兩零委係撙節核實並無浮冒照造清冊詳請具奏前來臣等覆核無異 得旨該部議奏 東華續錄

五月二十日湖廣總督張之洞湖北巡撫譚繼洵奏爲三省江隄工程緊急民力未逮撥款興修工竣事竊查湖北黃梅縣與江西德化縣安徽宿松縣濱江連界共管之同仁隄關繫三省利害係於道光十八年由湖北督撫臣奏明蒙恩撥發庫款銀十萬兩創建計長一千九百餘丈隄成編列康樂和親安平六字號責令黃梅德化宿松三縣業民按畝分承歲修保固厥後遂爲三省公隄遇有改建大工

歷由三省勻籌借撥經費通力合作光緒十六年七月因江水增漲該隄冲刷塌卸勢甚危險由黃梅德化宿松三縣會稟估修並准江西安徽二省先後咨商到鄂飭據該三縣會稟勘得該隄自和字號與親字一號起至五號止隄岸坍塌擬自樂字號老隄至安字號丁家口止勘定基址改建長隄一道藉資捍衛計長一千一百三十八丈五尺估需經費二萬五千九百七十餘兩三省分派每省應發銀八千六百五十七兩零懇即撥款興修等情臣等查該隄雖係官督民修遇有大工向係三省勻籌經費同治年間曾經撥給賑款應用及借款興修緣黃梅縣屬低鄉居多每遇江水稍長田地輒被淹沒近年長江自九江一帶南岸沙淤漸寬北岸江溜冲刷日甚是以連年以來均遭水患民情困苦異常該隄關繫三省田廬賦命唇齒相依當此工程緊急之際刻難延緩若拘泥官督民修責令照章集費民力實有難支必致貽誤事機所關非細且歷年雖有借款徵還之說亦係有名無實此次大修急工與尋常歲修培補不同惟有三省會商籌辦疊准江西安徽兩省來咨俱係籌發官款應用湖北省自應力籌合作以竟全功當即飭司核議籌款於鄂省賑捐項下提撥銀八千六百五十七兩發交黃梅縣具領並委同知李雯會同該縣及江西安徽兩省印委各員妥商趕辦即於光緒十七年二月十三日興工四月初二日一律完竣並據該印委等核實摺節工竣餘錢九百千文除備是年該隄防險之資三百千文外所有餘錢六百千文批飭提存發典生息以備同仁隄歲修經費不准挪移他用當經飭委署黃州府知府存厚前往驗收據報承修之隄委係如式修築完固並無草率偷減等情據湖北布政使王之春詳請具奏前來臣等覆核無異除飭將用過土方工料照例造冊並取保固限結詳咨

外所有籌款合修同仁隄工竣緣由謹合詞恭摺具陳張文襄公奏稿

是月丙戌二十九日剛毅奏蘇省農田全資水利臣前年履任後察核瀕海各口河道因潮汐往來大都淤塞當將吳淞白茆蘊藻等河次第籌款興挑在案旋查得常熟昭文二縣境內之福山港河道爲該二縣民生利賴所關徐六涇一河爲長洲元和常熟昭文無錫金匱江陰七縣灌溉要區向先借款開挑隨後分年按田攤徵歸款又該二縣境內之高浦耿涇海洋塘西洋港等四河歷係民捐民辦現因福山港等六河年久失濬漸就湮塞亟宜一律疏鑿深通以資蓄洩卽經飭司派委熟悉水利工程之候補知府周蓮前往會督官紳確切勘估各該河道共計工長一萬六千餘丈連築壩戽水局用經費等項約共需錢合銀三萬八千六百餘兩惟工長費鉅一時無可措墊復督同籌議於蘇州藩庫收存賑餘項下如數借撥俾濟工需所有福山港徐六涇兩河照章由得沾水利各縣於忙漕內分年帶徵歸款其高浦等四河據該二縣官紳議請於城鄉糴糶米石每石各捐錢四文彙集解還司庫詳經臣批准照辦一面飭令趕緊集夫開挑去後旋據稟報於本年正月初十日築壩興工分派員董按段監挑中間連遭陰雨節節停止賴該委員等任事踴躍於三月二十三日全工告竣臣親詣河干逐段測量勘驗所挑工程均屬如式寬深已飭啓壩放水舟楫暢行無阻農商歡忭用過工費均尙撙節核與原估並無浮冒 下部知之東華續錄

七月二十日江西巡撫德馨片奏再江西糟糧規復三限舊章各屬所收限外加價銀兩解存道庫彙報專爲修隄之用先經臣奏明在案茲查光緒十七年分據南昌等縣先後稟報各河隄被水沖決民

情困苦懇給加價銀兩興修以工代賑等情臣批司委員分赴各該縣逐一勘估監修旋據該印委等稟復南昌縣集義圩防禦經費錢三百千文照時價扣銀一百九十四兩五錢二分又該縣修築上富倉圩實需經費錢一千二百串照時價扣銀七百九十八兩又該縣北鄉各圩隄每歲一次修費錢二百八十五千文照時價扣銀一百八十九兩五錢二分五釐以上各隄修費共銀一千一百八十二兩四分五釐均由糧道隨時放給糟糧加價銀兩又德化縣修築赤松鄉永興隄潰口工料銀三百兩又省城德勝門外大王廟等處隄岸修費銀五百六十三兩六分二釐又振武軍弁勇搶築大王廟隄岸工料銀三百兩又南昌縣修理張牙瀝圩決口工料銀七百五十三兩六錢九分八釐又該縣集義圩添建石閘工料銀三百五十六兩四錢又德化縣修築驛里初公順水等隄工料銀三千四百五十四兩二錢七分二釐又該縣修築桑落鄉四洲禦江隄工料銀二千五百兩又南城縣修築南鄉隄墻工料銀一千兩以上各隄修費共銀八千二百二十七兩四錢四分二釐均係工關緊要費不可省經各該處並司庫先行籌墊放給嗣經照章在於漕糧加價銀兩內分別撥還歸款並據各該縣印委各員先後具報監修隄工一律告竣據布政使方汝翼會同督糧道鄧蓉鏡詳請具奏懇將所給南昌等縣修隄工費銀兩均請查照成案邀免歸繳俾紓民力而廣皇仁等情前來臣覆覈無異所有光緒十七年江西各屬應修隄岸工費動用漕糧加價銀兩緣由理合附片陳明 奉硃批着照所請該部知道諭摺彙存

八月十三日委員歐陽定果會同天門沔陽漢川三縣知縣勘修萬福閘及疏挖成功共濟二閘淤溝

估計動土興工通稟 竊卑職接奉藩憲札開案奉督部堂張批天沔川三州縣會稟遵飭會勘三邑
交涉之萬福大閘及成功共濟二閘開廢溝淤諭據正紳估計建疏工費情形懇請委員下縣駐工督
修並繪圖開摺覈核由奉批據稟已悉該處建疏開工係三邑會辦之事既據督同該紳首等勘估照
章集費興辦該州縣等勢難兼顧仰北布政司覆核如稟遴委熟習隄閘工程之員馳往駐工會同各
州縣認真督辦務期工堅料實費不虛糜迅速告竣以資保衛復奉撫部院譚批據稟已悉仰布政司
卽委員前往駐工督辦並飭該州縣會同紳首趕緊集費興修務於春汛前一律完竣以資宣洩毋稍
延誤等因合亟札委札到該牧歐陽定果卽便遵照剋日起程馳赴工次會同各州縣督率紳首認真
勘估照章集費興工務期工堅料實費不虛糜迅速完工稟請委員驗收毋稍懈怠等因奉此卑職定
果遵札起程於七月十二日行抵工次當卽備文移請天沔川三州縣約期七月二十四日齊赴工所
卑職成慶卑職世恩卑職興寅接委員公文均於是日齊赴萬福大閘工次履勘鉅工卑職定果遵卽
於二十五日會同三州縣並各邑紳士以及工房書役石木土工各匠先勘萬福之廢閘工程及萬福
閘來源淤溝長短淺深估計石工若干木工若干土工若干勘明萬福雙壘原閘建在沔境閘廢跡沒
片石無存此次重建重門疊戶應於原閘稍東半里許地實灘寬庶可垂久二十六日會同官紳工書
履勘下三十里之共濟閘淤塞遠近若干該閘建於漢川所屬之老官廟二十七日會同官紳工書履
勘下四里之成功閘淤塞遠近若干該閘建於沔屬之剝嘴卑職等於二十五六七三日將三閘工程
逐細勘明估計各項經費略有成竹總期費不虛糜工堅料實實事求是出斯民於水火仰副憲臺拯

饑拯溺之至意伏查三閘工程緊要其首在於重建萬福大閘其次在於共濟疏淤成功雖淤又其次也工程有緩急地勢有利害此次三邑鉅工蒙憲臺批飭各州縣照章斂費因三邑紳民人心混雜權不歸一故一面斂費一面請委駐工卑職定果經三州縣稟請奉委督修不能不移緩就急與利去害工程早歲一日三邑早收一日之益經費撙節一文而窮民共受一分之惠查萬福大閘爲三州縣居民膏腴積潦吐洩之咽喉同治三年建修雙甕民樂畎畝衣食之安光緒四年岳口潰隄而膏腴變成澤國正供無出民不聊生雖有下成功共濟二閘不能洩七十二垵之瀦流卽以成功共濟二閘而論共濟閘雖屬單甕地勢較低不過建閘時經費不敷閘成而溝未疏濬成功一閘建自雍正年間雖屬單門單戶而年遠日久頭甕將近傾洩所恃者僅有第二甕單戶而地勢之高見形於上下之勢縱極淤亦難永固此卑職等奉委勘明地勢移緩就急與利去害之大致情形也萬福一閘向係雙甕此次經官紳稟請重建改爲重門疊戶以圖一勞永逸工程垂久連日與石匠估計重門疊戶計前後四甕後兩甕每甕身長十四丈計二十八丈前兩甕每甕身長十丈計二十丈門寬六尺高八尺五寸底石必須湖南金子灣石料每塊長八尺寬一尺五寸其甕石牆石海底梭尖均定嘉魚蒲圻之石此外杉木釘樁又須於漢陽採買共計石料灰蔴炭油以及杉木到岸各項水脚及州縣紳士斂費局暨閘工收支帳房書啓巡勇差役伙食辛工約估計在三萬之譜現已稟請藩憲轉詳撫憲加恩免繳石木兩項釐金已發護照給石木二行於湖南嘉蒲各處購石木匠於鸚鵡洲採辦木料此閘工重建重門疊戶之實在情形也至萬福大閘之來源壅塞約計近四里之地閘旣重建溝必暢疏此萬不可省之

費至於共濟一開閘內淤塞四里閘外淤塞一里亦急宜疏通俾溝深港闊庶積水易於暢流約計土工又在六千之譜至於成功一閘地勢較高而頭壘衝洩之險勢難保其無慮應可作爲緩計以紓民力此三閘淤溝宜疏宜緩之實在情形也茲定擇期於八月初一日動工祀土大工旣興卑職成慶督紳欽沔陽七十二垵居民之畝費卑職世恩督紳欽天門七十二垵居民之畝費卑職與寅督紳欽漢川七十二垵居民之畝費三州縣按畝集費分別等第陸續備文移解不掣委員之肘不貽功敗垂成之患至於督工收發錢項由卑職定果諭飭三邑紳士及自帶巡勇督工管帳司事人等一一眼同各有專責互相經理以杜衆人影射圖利之弊以釋三州縣窮民出費虛糜濫用之疑俟工程告蒧稟請委員驗收外卑職等謹將奉札建修萬福大閘重門疊戶石木土工等項以及萬福共濟二閘水源應疏長短寬窄淺深約計各項經費總共需三萬六千串之譜以及給護採石辦料剋日動工緣由據實估計理合會稟縷陳稟報懇求俯賜查核襄隄成案

九月壬辰(初七日)張之洞譚繼洵奏峽江之險甲於天下上自四川夔巫交界之涪石起下至湖北東湖之虎牙灘止計水程四百餘里險灘五十餘處行旅船隻往來動輒失事夏秋尤甚覆溺之患無日無之其情狀慘不忍言光緒二年前四川督臣丁寶楨在山東巡撫任內捐集銀四千兩匯寄到鄂經前兼署督臣翁同爵札委總兵羅縉紳等釘造大小救生紅船十五隻連舊有培元堂等處紅船四隻擺江二隻共計船二十一隻光緒八年前湖南提督鮑超奏奉諭旨著湖廣總督湖北巡撫籌撥款項於著名險灘處所酌量添設紅船並飭屬隨時認真救護以保行旅等因欽此又經前督臣涂宗瀛前

撫臣彭祖賢奏明添設救生紅船六隻光緒二十四等年前任浙江按察使黃毓恩先後捐設二隻統計現設紅船二十九隻分泊各灘均歸宜昌鎮總兵羅縉紳督率救護所需舵工水手工食修船經費除黃毓恩二隻培元堂舊有二隻有存款備用外其餘二十五隻均在宜昌川鹽局五成充餉公費項下就近撥給歷年以來全活人口甚衆頗著成效惟險灘過多紅船尙少行旅往來仍多企望茲據湖北宜昌鎮總兵羅縉紳稟稱查峽江著名險灘全在湖北境內江中亂石縱橫地段甚長相隔十餘里或五六里必有一險要之灘有水漲而險者亦有水枯而險者情形時有變遷一遇覆舟求救近則可以立時往援遠則時慮鞭長莫及宜昌爲川楚通衢川鹽商人均在該處聚集自設立通商口岸以來華洋雜處益形繁盛近來重慶開設新關商賈行旅更倍從前其滇黔兩省運解銅鉛軍械委員亦皆由峽江行駛尤關緊要凡此往來之官商莫不倚紅船爲保護每至身當危難而卒獲安全者實賴紅船救援之力居多惟官商船隻大者百餘人小者亦數十人設遇覆溺延頸待救紅船僅可容載數人多則有擁擠沉淪之患大約每日仍必有覆溺之船情形甚慘若次第接救覆舟危在呼吸迫不及待往往難獲生全體察情形原設紅船實屬不敷分布擬請再行添造紅船十五隻並添造舢板三號以資彈壓梭巡督飭認真撈救等情臣等批飭湖北藩臬兩司鹽法道會同善後川鹽各局妥議詳辦當據該司道詳覆以該鎮籌議各節均係實在情形應請照擬添設各船統歸該鎮羅縉紳管理督率救援以保行旅且商舶鹽船連檣而下每逢夏令盛漲往往停泊不行今添設紅船十五號連原有之船共四十四號分泊梭巡又得舢板往來稽查彈壓商人恃以無恐當可通行無阻於抽收鹽貨釐稅

等項均有裨益已於六月趕造工竣查驗船身一律堅固統計添設紅船十五號舢板三號每年經費共需銀四千四百餘兩三年大修一次經費銀約五百餘兩照案仍請在於宜昌川鹽局五成充餉公費項下開支均歸善後局造冊報銷所費無多於正項餉需並無妨礙而峽江行旅受惠無窮等情並詳請奏前來臣等查峽江之險上廬宸衷前經欽奉諭旨於著名險灘處所飭令酌量添設紅船隨時認真救護以保行旅仁施廣被感頌同聲現經臣等體察情形險灘過多行旅日盛原設紅船實屬不敷拯救督飭該司道等籌捐添設歲需經費援案開支於正項餉需並不相妨而行旅安全羣欣利涉洵足以保民命而廣皇仁 得旨如所請行

東華續錄 按譚繼洵爲湖北巡撫

是月二十七日張之洞奏爲荊江三汛安瀾萬城大隄防護穩固事竊查荊州萬城大隄濱臨荊江爲全郡及下游田廬保障最關緊要本年輪應總督赴隄督防臣前以應辦要務甚多未克分身前往當經奏明飭委荊州府知府舒惠督同文武員弁妥爲防護在案茲據該府稟稱本年自夏徂秋川江及沮漳諸水盛漲同時併發最大之時高過楊林洲石磯九尺有餘兼之南風時作波濤撞擊官民各隄節節危險隄身多有衝刷坍塌殘缺浸漏之處該府督同在工文武員弁隨時設法搶築幸得化險爲平現已節近霜降水勢消退全隄悉臻穩固普慶安瀾等情前來除仍飭實力巡防俟水落歸槽再將應修各工詳履勘查乘此冬晴水涸循例派工興修以禦來年汛漲外所有本年防護荊江萬城大隄三汛安瀾緣由理合會同湖北巡撫臣譚繼洵恭摺具奏諭摺彙存

十一月初十日安徽巡撫沈秉成奏爲安徽省城開河築隄工程完竣奏銷用過工料銀兩事竊照安

徽省城濱臨大江水勢急溜風浪時驚商舶難停市井蕭索臣博採衆議開挖西門外漳霞港河道並築長隄飭委署藩司嵩崐統領水師澄清營記名提督柳金源會商妥辦於光緒十六年九月開工估計工料等項需銀四萬數千兩臣於十七年十一月奏明動用賑捐餘銀九千餘兩就地措集銀一萬兩請旨於釐金項下動撥銀二萬數千兩欽奉硃批着照所請該部知道欽此臣遵飭省城皖南淮北三釐局分次勻撥共銀二萬八千兩陸續解濟工用查此項開河築隄工程自漳霞港開濬起至江口止共長七百十八丈有奇挑寬六十丈至二三十丈挑深四五尺至二三尺不等期與江水枯落之時測底配平河口上下一帶各築高厚長隄近江頂溜之處加築石隄密釘排椿以禦風潮由南至北修築偃月隄一道以遏石門潮傾注來源俾免泥沙灌入淤墊河身十七年春水發生暫停工作至冬令水落歸槽仍責成嵩崐柳金源接續開辦招集夫工從事畚築開挖河道現已一律深通各隄亦均修築完固於本年八月二十七日全工告竣稟經臣委員驗收所辦各工均屬堅深鞏固毫無草率偷減情事惟新築土石各隄外內河水深溜急朝夕衝盪甚爲喫重且江邊土性鬆浮難保日久不致墊墊應否於每年冬季水落時察看情形酌量培修之處屆時再行察辦至此次挑築各工除河夫營勇通力合作不計土方丈尺並塘水器具鐵鍬籬筐扁擔繩索等項係由河夫自備毋庸開造價值外其餘採辦木椿條石石灰姜米鐵礮各項物料以及支發河夫口糧土方工匠價銀均係仿照核實給發實用實銷並無絲毫浮冒共計工料銀四萬七千一百一十四兩零內河夫口糧銀二萬一千一百六十兩零木石各匠工價銀一千三百七十四兩零土方木石各項木料價值銀二萬四千五百七十九兩

零 又片奏再查安徽宿松縣與江西德化縣湖北黃梅縣共管之同仁隄前於光緒十六年間因隄身倒塌且又逼近坍江必須擇地另建方資抵禦據前署宿松縣知縣尹起鸞會同德化黃梅二縣勘估計遷建長隄一道共需經費銀二萬五千九百七十一兩零三省勻籌每省應發銀八千六百五十七兩零稟經前護撫臣阿克達春奏明在於皖省賑捐餘款項下如數動撥給領興修在案茲據辦理賑捐局司道詳稱宿松縣承修同仁新隄自親字號接江西德化縣新隄起至安字號丁家口止共長五百丈經該縣尹起鸞親駐工所督董募夫按段挑築於光緒十七年二月十七日開工至四月十七日工竣計挑隄翻沙並堆積土牛共用土六萬五千六十八方零發給銀九千五百四十九兩零除將奉撥銀兩儘數動用仍不敷銀八百九十二兩零業經該縣籌墊清款並由藩司札委候補直隸州知州徐宗澄前往逐一驗收所修工段委係如式挑築堅實並無草率偷減諭摺彙存 民國安徽通志水工稿引光緒皖政輯要未刊本載光緒十八年宿松縣遷同仁新隄知縣趙廷瀚稟稱該縣與江西德化縣湖北黃梅縣共管同仁隄前於光緒十六年間因隄身倒塌且又逼近大江必須擇地另建方資抵禦據前署宿松縣知縣尹起鸞會同德化黃梅二縣勘估計遷建長隄一道共需經費銀二萬五千九百七十餘兩三省勻籌每省應發銀八千六百五十餘兩稟經護撫阿奏明在於皖省賑捐餘款項下如數動撥給領興修查宿松承修同仁新隄自親字號接江西德化縣新隄起至安字號丁家口止共長五百丈於光緒十七年二月十七日開工至四月十七日工竣在宿松一縣工程所費除奏撥賑款不敷外另籌完工已踰萬金該隄爲三省田廬保障計長一千一百三十八丈五尺編立康樂和親安平六字號議定每年三縣分段承修毋令坍塌

是月十二日德馨奏再查前准工部咨江西奏星子等縣應修隄閘各工並德化縣同仁隄工動用漕

糧加價及米穀釐金各銀兩一片奉硃批該部知道欽此相應行文江西俟前項各工修竣後即將作過工程用過銀兩先後開單奏報照例造冊送部覈銷並取承修各員保固印結繪圖貼說一併隨案送部以符定制等因到臣當經行司轉飭遵辦去後茲據布政使方汝翼詳稱查江西德化縣與湖北黃梅縣安徽宿松縣沿江連界共管之同仁隄原係編列康樂和親安平六字號責令宿松黃梅德化三縣業民按畝分承保固關繫三省田廬賦命自光緒十六年七月因江水盛漲該隄衝刷坍塌勢甚危險由該三縣會勘估修並奉行准湖北安徽二省咨商飭據該三縣會稟勘得該隄自和字號與親字一號起至五號止隄岸塌卸擬自樂字號尾連和字號老隄接頭起至安字號丁家口止擇定基址改建長隄一道計長一千一百三十八丈五尺內坐落宿松界內五百丈黃梅界內二百八十八丈五尺德化界內三百五十丈共需經費銀二萬五千九百七十一兩九錢四分七釐三省分派江西應認籌銀八千六百五十七兩零懇即撥款興修等情當由司覈議詳准在於江西出境米穀抽收釐金項下照數籌撥發給德化縣具領並委試用知縣鄭德凝會同該縣及鄂皖兩省印委各員覈實興修當將撥款興工日期彙同星子等縣隄工動用漕糧限外加價銀兩各緣由一併詳蒙奏報嗣據署德化縣張鳴珂稟報承修同仁隄段於十七年四月初七日一律工竣原領經費銀八千六百五十七兩三錢一分五釐覈實撙節用銀八千零三十四兩三錢六釐尚餘存銀六百二十三兩九釐再由該令捐廉湊足千串存店生放留本動息以爲搶險歲修之用等情稟奉批飭照辦並由司札委湖口縣知縣徐允升前往驗收據報確勘承修之隄委係如式修築完固並無草率偷減諭摺疊存

是年屏山縣六月江水陡漲沖圯西南東一帶城垣七十三丈又北門坍塌城垣十五丈有奇屏山縣續志

是年至十九年萬城隄觀音磯加寬碎磯嘴六尺長八尺上首砌石擺脚七十丈保護磯身 荊州萬城隄續志

光緒十九年□月（約在三四月間）荊州府知府舒惠加修郝穴新塹土石各工稟 查郝穴上下新塹石工原腳勢甚陡懸沿隄多係吊樓居民安土重遷難以施工數十年來礙難議修雖逐年於隄脚多拋石方設法保護然一經大汛仍有坍塌年復一年終屬可懼卑府每於修防駐工無不深慮亟應籌修善策以爲一勞永逸之計惟該隄脚形如壁立安瀾水甫歸槽未至極低且去冬水涸之後又值大雪嚴寒冰凌堅厚難以確實勘估故詳報冊內未及聲明嗣於春初雪融凍解卑府督同工員逐細察看該處石工經大凌之後間有走動靠隄街內面已估修內幫靠隄街外面濱臨大江不得不創建石岸爲該鎮全隄保障旋即丈量估計購料興工一面剴切曉諭居民限令將有礙修工之吊樓一律拆退其建築之法先用三合土堅築根基穩固再用毛石砌脚外護碎石坦坡上砌石岸兩層每層高五尺零石縫灌足灰漿用三合土層累夯築堅固統計土石兩工高二丈四尺逐層收分陂陀斜下上鋪寬厚青板石用石灰抵縫以免滲漏共計長一百丈現已修竣總共需錢七千串之譜此在詳報歲修派土後續出工程未便加派已由卑府先行挪墊辦理擬在本年節省項下如數提還合併陳明荊州萬城隄續志 續志又載郝穴石砌岸圖說云郝穴上新塹乃濱江要工且沿隄多係吊樓居民安土重遷難以施工是以數十年來礙

難估修雖逐年於隄脚多拋石方爲搪護計然一經大汛仍有溜經且江灘不能保其不坍年復一年終屬可慮亟思籌一善策隨與曹主簿商經久之法惟有靠隄街內面厚培土幫靠隄街外面濱臨大江創建坦坡石岸爲該鎮全隄保障丈量估計購料興工一面剝切曉諭居民限令將有礙修工之吊樓一律拆退建築之法先用三合土堅築根基再用毛碎石砌脚外護碎石坦坡上砌石岸兩層每層高五尺零石縫灌足灰漿用三合土層累夯築堅固逐層收分陂陀斜下上鋪寬厚青板石用石灰振縫以免滲漏共計高二丈四尺長一百餘丈光緒十八年壬辰冬月興工癸巳三月完工是年大汛穩固已有成效

四月十八日湖北巡撫譚繼洵奏爲委員代防萬城大隄事查荊州府知府舒惠在任年久於隄務尙能悉心講求堪以委令代防現經檄委該府會同文武員弁親駐工所晝夜梭巡預備守水器具遇有險要工所隨時搶護並札飭荆宜施道周懋琦隨時查察督辦務臻穩固諭摺彙存

七月十八日張之洞譚繼洵奏爲勘明藕池口一帶水道礙難堵築情形遵旨籌議湖南湖北兩省均無妨礙辦法恭摺覆陳事竊臣等前准軍機大臣字寄光緒十八年五月初四日奉上諭都察院奏湖南京官郎中張聞錦等以水患日迫請復舊隄繪具圖說赴該衙門呈遞一摺據稱湖北藕池口等處湖隄潰決灌入湖南常德府屬被害最重惟有規復舊隄堵塞潰口或於藕池口東南築長隄一道兼濬深洪俾入大江由江入海以消上下游水患藕池口潰隄情形前經張之洞親往查勘奏陳大概擬與湖南巡撫會商辦理現在該處水勢究竟如何該督撫等會否妥籌辦法此次張聞錦等所呈各節是否可行著張之洞譚繼洵張煦會同悉心商酌妥議辦理總期與湖南湖北兩省地方均無妨礙以弭水患而衛民生原摺呈均著鈔給閱看原圖一件並著發交張之洞等閱看後仍行繳回將此各諭令知

之欽此遵卽恭錄咨行分委前署湖北荆宜施道曹南英湖南岳常澧道廷杰督同兩省委員湖北知府札勒哈哩唐樹滋湖南知府徐培元暨濱湖各縣馳往藕池口一帶地方率同原遞公呈之常德府紳舉人梅安等查照所呈各節會同詳切履勘並將調絃虎渡各口派員分別測量繪具圖說會同稟復時值水勢尙盛猶恐測勘未確復經臣之洞選調廣東精於測繪之委員老穎安學生潘元普等來鄂檄委湖北荆宜施道周懋琦候補道裕庚帶同該員生等於春汛未到之先馳往藕池口內外履勘將緊要處所重加測量繪圖貼說分晰稟覆先後飭據湖南布政使何樞湖北布政使王之春核議具詳請奏前來臣等查常德府紳士刑部郎中張聞錦等原呈請堵塞藕池潰口欲障荆江濁流使無南汜自係爲水患日深保衛桑梓起見惟事關湖南湖北兩省利害必須統顧兼籌且查所呈各節於現在江流改道之情形及各口能否疏濬之地勢尙未深考茲經疊次詳勘熟議臣等覆加考核往復籌商謹將藕池等口實有礙難堵築情形敬爲我皇上縷晰陳之查藕池爲荆江南岸大隄當日因江心沙洲太多逼江溜直趨南岸藕池正當西南頂灣之處咸豐二年遂至冲成巨口分引大溜常德內出之水不免壅遏不暢然江水過藕池繞石首始北歸入正洪亦甚迂折不便自光緒十三年王家大路迤北之沙洲被江水自行冲出新口徑張家灣水勢較順西南一帶天心洲日漲江溜爲沙洲所遏日趨日北由王家大路新口東北流歸大江正洪者日多南入藕池潰口者日少藕池口門當日之正值頂灣者今日已在新口之下實測今日藕池潰口之水較之昔年初潰時已減其半現在入藕池口門內數里卽有沙沙日墊則水日緩以後入口之水自當日見其減而王家大路改道後大江縈迴如玦北